

# Katerisimaartarnernut, ininut kikkunnit tamanit iserfigineqarsinnaasunut assartuutinullu killilersuigallarnerit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6, 12 a aamma 12 b, aamma § 29, imm. 2 malillugit aalajangersarneqarpoq:

## *Atuuffiata killilernerqarnera*

**§ 1.** Nalunaarummi §§ 2-4 katersuunnernut naalakkersuinikkut allatulluunniit isummersornissamik siunertalinnut atuutinngillat.

*Imm. 2.* Nalunaarummi § 5 napparsimavinnut, nakorsiartarfinnut kiisalu nakorsiartarfinnut namminersortunut niuertarfinnilu peqqissaanermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

*Imm. 3.* Nalunaarut ulluunerani neqeroorutunut namminersortunut pisortaniillu pigineqartunut, atuarfinnut, ilinniarfeqarfinnut il.il. atuutinngilaq, nappaatit tunillaassortut akiorniarlugit iliuutsit pillugit Inatsisartut peqqussutaanni § 22 takuuk.

## *Aaqqissuussinernik il.il., peqataaniarnermi kommuninit allanit angalaqqaarluni peqataaffigineqarsinnaasunik inerteqquteqarneq*

**§ 2.** Illup iluani silamilu aaqqissuussanik, nalliuttorsiornermik, sammisaqartitsinernik assigisaannilluunniit ingerlataqarnerit, nalinginnaasumik aaqqissuussanut, nalliuttorsiornermut, sammisaqartitsinernut assigisaannulluunniit peqataaniarnermi kommuninit allanit angalaqqaarluni peqataaffigineqarsinnaasut taamatulluunniit naatsorsuuteqarfigineqartut inerteqqutaapput, taamaattorli imm. 2 aamma 3 takukkit.

*Imm. 2.* Aaqqissuussani, nalliuttorsiornermi, sammisaqartitsinerni assigisaannilluunniit peqataanisamat nalunaarnissamik piumasaqaatilinni inuit kommuninit aamma nunanit allaneersut aaqqissuussamat, nalliuttorsiornermut, sammisaqartitsinermut assigisaannulluunniit peqataasussatut nalunaarsorsinnaannginnissaat aaqqissuussisup qulakkiissavaa. Oqaaseqatigiit siulliit eqqortinneqarpata, aaqqissuussineq, nalliuttorsiorneq, sammisaqartitsineq assigisaalluunniit ingerlanneqarsinnaapput, taamaattorli §§ 3 aamma 4takukkit.

*Imm. 3.* Pikkorissartitsinerit, isumasioqatiginnerit assigisaallu imm. 2-mi ilaapput.

*Imm. 4.* Namminerisamik aaqqissuussinerit, soorlu kuisitsinerit, inuuissiornerit, apersortinnerit, soraarummeertoqarneranut atatillugu nalliuttorsiortitsinerit, katinnerit ilisinerillu imm. 1-imi ilaanngillat. Namminerisamilli aaqqissuussinerit § 3, imm. 1-imi aamma § 4, imm. 1-imi ilaapput.

*Illup iluani aaqqissuussinerit il.il., kommuninit allaneersuunngitsunik peqataasullit*

**§ 3.** Illup iluani aaqqissuussinerit, nalliuttorsiortnerit, sammisaqartitsinerit assigisaallu § 2-mi ilaanngitsut amerlanerpaamik 100-nik peqataasoqaqqusaapput, § 5-imillu maleruaassallutik.

*Imm. 2.* Aaqqissuussisoq aaqqissuussamut, nalliuttorsiortnermut, sammisaqartitsinerimut assigisaannulluunniit inuit peqataanissaannut toqqaannartumik kajumissaarissanngilaq.

*Silami aaqqissuussinerit il.il., kommuninit allaneersuunngitsunik peqataasullit*

**§ 4.** Silami aaqqissuussinerit, nalliuttorsiortnerit, sammisaqartitsinerit assigisaallu § 2-mi ilaanngitsut amerlanerpaamik 250-inik peqataasoqaqqusaapput.

*Imm. 2.* Aaqqissuussisoq aaqqissuussamut, nalliuttorsiortnermut, sammisaqartitsinerimut assigisaannulluunniit inuit peqataanissaannut toqqaannartumik kajumissaarissanngilaq.

*Ininut kikkunnilluunniit iserfigineqarsinnaasunut piumasaqaatit*

**§ 5.** Inuussutissarsiummik ingerlatalit aamma suliffeqarfiit pisortanit pigineqartut ininik kikkunnit tamanit iserfigineqarsinnaasunik pigisallit piumasaqaatinik makkuninnga naammassinnissimassapput:

- 1) Inuit inimut qatserisartoqarfinni oqartussaasunit akuerineqarsimasumut isersinnaatitaasut amerlanerpaaffissaasa affaannaat isersimaqqusaapput. Inini qatserisartoqarfinni oqartussaasunit akuersissutitaqartinneqanngitsuni, natermi 4 m<sup>2</sup>-iusumi amerlanerpaamik inuk ataasiinnaaqqusaavoq. Nateq 4 m<sup>2</sup>-imit mikineruppat oqaaseqatigiit aappaat apeqqutaatinnagit inuup ataasiinnaanissaa akuerineqarsinnaavoq. Nateq oqaaseqatigiit aappaanni pineqartoq qanoq pequteqartiginera apeqqutaatinnagu iikkamiit iikkamut naatsorsorneqassaaq.
- 2) Ajornanngippat init imatut pequsersorsimassapput suliffeqarfillu imatut ingerlanneqassallutik tuniluunnissaq minnerpaaffianiitinneqassalluni, tassunga ilanngullugu pisisartut pulaartullu imminnut qanillinninnissaat periarfissaqartillugu.
- 3) Inimi ininiluunniit tamanit iserfigineqarsinnaasuni eqqiliusaarnissaq ileqqorissaarnissarlu pillugit Nunatta Nakorsaaneqarfianiit paasissutissanik nivinngaasoqassaaq.
- 4) Sulisut tamarmik Nakorsaaneqarfiup eqqiluisaaqqissaarnissamik ileqqorissaarnissamillu innersuussutaanik malinninnissaat qulakkeerneqassaaq.
- 5) Pisisartunut pulaartunullu ajornanngippat imermik qaqorsaammillu imaluunniit assammut spritimik peqassaaq.
- 6) Nerisassanik poortorneqarsimanngitsunik tuniniaanermi sulisut aqqateqassapput.

**§ 6.** Inuussutissarsiummik ingerlatalik politiit naliliinerat malillugu § 5-imik unioqqutitsisimappat, inuussutissarsiummillu ingerlatalik § 5-imik malinninnissaa ilimagineqanngippat, inuussutissarsiummik

ingerlatalik inip piffissami aalajangersimasumi tamanut matoqqatinnissaanik politiinit peqquneqarsinnaavoq.

#### *Assartuutitut piumasaqaatit*

**§ 7.** Assartuutit issiaffiusinnaasut sinnerlugit ilaasoqaqqusaanngillat. Oqaaseqatigiinnik siullernik eqqortitsinissaq assartuummik piginnittup akisussaaffigaa.

#### *Pineqaatissiissuteqartarnej*

**§ 8.** Aaqqissuussisut §§ 2-4-nik unioqputitsisut pinerluttulerinermik inatsit malillugu pineqaatissinneqarsinnaapput.

*Imm. 2.* §§ 5-imik aamma 7-imik unioqputitsisoq imaluunniit § 6 malillugu peqqusummik unioqputitsisoq pinerluttulerinermik inatsit malillugu pineqaatissinneqarsinnaavoq.

*Imm. 3.* Ingerlatseqatigiiffit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

#### *Atuutilersitsineq, ikaarsaarnermi malittarisassat piffissarlu atuuffissaa*

**§ 9** Nalunaarut 2. august 2020-mi atuutilissaaq.

*Imm. 2.* Nalunaarut malillugu killilersuinerit, inerteqquteqartitsinerit, peqqusinerit il.il. 31. januar 2021 ilanngullugu atuutissapput.

*Imm. 3.* Aaqqissuussisut § 2, imm. 2-mi pisussaaffiat, tassa inuit kommuninit allaneersut aaqqissuussanut, nalliuttorsionernut, sammisaqartitsinernut assigisaannulluunniit peqataasussatut nalunaarsorsinnaannginnissaannik peqataannginnissaannillu qulakkeerinninnissaq ulloq 20. juni 2020-mi atuutilerpoq. Inuit ulloq 20. juni 2020 sioqqullugu taakkununga aaqqissuussanut, nalliuttorsionernut, sammisaqartitsinernut assigisaannulluunniit peqataaniarlutik nalunaarsorsimasut taakkununga peqataasinnaapput.

*Imm. 4.* Aaqqissuussisut § 3, imm. 2 aamma § 4, imm. 2-mi toqqaannartumik kajumissaareqquneqannginnerat ulloq 20. juni 2020-miit atuutilerpoq.

*Namminersorlutik Oqartussat, ulloq 31. juli 2020*

Anna Wangenheim

/

Tine Pars

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut